

In luf equipaus cun in emettur

(fmr/hh) La gievgia sera eis ei reussiu alla survigilonza da catscha da narcotisar in luf e d'equipar quel cun in emettur. Igl Uffeci da catscha e pesca dil cantun Grischun spetga da quel uss in tschuppel informaziuns.

La mesjamna sillla gievgia ha in luf scarpau ina tscharva sut Soliva en Val Medel. Returnaus el liug la gievgia sera ha la survigilonza saviu narcotisar el. Sco quei ch'il cau digl uffeci *Adrian Arquint* ha detg sin damonda dalla FMR retracta ei d'in animal masculin. Ei savessi esser quel ch'ins hagi constatau el contuorn da Medel, Mustér e Tujetsch il davos temps, denter auter en accumpignament d'ina femella.

Impurtontas informaziuns

Il luf ch'era curdaus si ella Val Medel dappi in temps ei vegnius equipaus cun in emettur. «Quel vegn a furnir a nus informaziuns il proxim temps. Duess ei veramein dar ina nova famiglia da luſs el contuorn sisum la Surselva vegnan quelles informaziuns ad esser da grond'impurtonza», di Arquint. Ins sappi lu dapli nua che quels luſs seigien effectivamein. Las datas exactas nua ch'il luf setegn si vegnan buca communicadas: «Nus vegnin segiramein ad orientar il mument ch'el s'avischina als vitgs ni a loghens cun animals da casa.» Dacuort era in luf vegnius equipaus cun in emettur a Sursaisa. Quei emettur ha denton buca funzioniau ditg e per quei motiv ein ins sedecidius ussa per in auter tip d'emettur pil luf en Val Medel.

Arquint refusa la critica

La critica da purs dalla Val Medel che l'informaziun davart il luf seigi buca stada sufficienta e buna il davos temps refusa Arquint: «Ils purs ein vegni orientai regularmein davart la preschientscha dil luf. Quei ei stau il cass già igl onn var-

gau.» Aschispert ch'in luf s'avischini me-mia fetg als vitgs sco quest unviern a Sur-saissa vegni quell'informaziun intensiva-da. L'informaziun dils purs davart la pre-schientscha dil luf vegn mintgamai dera-sada entras il Plantahof.